

Büssi

Text: Hans Jürg Zingg

Melodie: Leonard Cohen

Begleitimprovisation: Edwin Peter

was machen üsi büssi
wo sy de üsi büssi
ja was isch de mit de büssi
üsne stouze liebe ougetier
da chöme si aui nüüni
grau roti schwarzi wyssi
stuune ,tschou` mit grossen ouge
miaue gly druuf ,tüet is schtrychle`
loufen ufgregt hin u här
u schnürele lut u strychen üs um d füess
u zittre mit em schwänzi
u si trööle sech vor wööli sisch e fröid

u si trööle sech uf e rügge
u si päcklen is mit de täupli
u si byssen is i d finger
üsi häng sy nächär zeichnet vo däm spiu

was machen üsi büssi
wo sy de üsi büssi
was isch de mit de büssi
üsne göttlechsöne löölitier
itz spile si aui nüüni
u si jagen enanger nache
tüe wi haubverruckt das isch es
ougufryssen ohrelitze
näse zwicke mit de schwänz
aaschlyche warte füdele ggumppe
ruure fuuche tätzlebrätsche
so das d haar dasumestübe s isch e fröid

üses läbe mit de chatze
isch es luege lache stuune
und sech Sorge u sech fröie
isch e teil vo üsem sy vilicht dr bescht

was machen üsi büssi
wo sy de üsi büssi
ja was isch de wider mit de büssi
üsne tonnerwätters lumpegschir
am morge we mer ufstö
flueche mer lut ab ihrne spure
byschpiuswys verschleipfti bleischtift
büronadle wulechlungle
schregi biuder knicktü blueme
abegheiti gschir u büecher
gar nid z rede vo de chötzi
u de schysdrächschrirpen uf em teppichgwäb

doch de büssi chasch nid bös sy
u so blybt is nüt aus z lache
un is nid so sorge z mache
wäg däm bsitz wo mir da goumen um is um

was machen üsi büssi
wo sy de üsi büssi
ja was isch de mit de büssi
üsne süesse tüüsselibüssi
pscht si schlafe aui nüni
jedes gnäschtet uf sym plätzli
uf stüeu bett i chörb uf chüssi
u sogar bim hung uf em bettli
ihres schlafen isch so liecht
u doch so töif u konzentriert
ds erwache tuet nid we
si schtrecke sech u zeigen ihri zähmte roubtierzäng

chönnte mir wi chatze schlafe
de brchiemte mer nie gsüchti
bruuchte schlaflos nie nis z cheere
bruuchte yoga nümme z lehre s wär is woou

büüsseliwoou
büüsseliwoou